

Je n'ay plus que les os, un Schelette je semble

Decharné, denervé, demusclé, depoulpé,

Que le trait de la mort sans pardon a frappé,

Je n'ose voir mes bras que de peur je ne tremble.

Apollon et son fils deux grans maistres ensemble,

Ne me sçauroient guerir, leur mestier m'a trompé,

Adieu plaisant soleil, mon oeil est estoupé,

Mon corps s'en va descendre où tout se desassemble.

Quel amy me voyant en ce point despouillé

Ne remporte au logis un oeil triste et mouillé,

Me consolant au lict et me baisant la face,

En essuiant mes yeux par la mort endormis ?

Adieu chers compagnons, adieu mes chers amis,

Je m'en vay le premier vous preparer la place.

Pierre de Ronsard (1524-1585)

